

申椒集

下



申椒集卷下

闕里孔傳鐸振路



膠城孫致彌松



梁溪顧

彩湘



梅意

何處飄香雪年年繞此亭粉痕侵蠟屐玉質慕銅  
瓶堪擬凌波步羞為行雨靈倚欄明月夜想像立

娉婷

又

申林集 卷一  
逢君偏歲晚入笛恨難勝清夢來綃帳瓊姿怯夜  
燈袁安高卧久何遜苦吟增惆悵東風瘦橫斜影  
似冰

又

去伴孤山鶴迢迢霸岸遊芳魂何處杳香骨至今  
留漠漠南枝勁紛紛朔雪愁知君來不易萬里隔  
羅浮

題桃花扇歌

廣陵煙月秣陵春偶買扁舟來問津永和宮殿久

蕪廢獨聽野老話酸辛南朝自古傷心地那堪追  
數當年事偏安天子學無愁泣血老臣徒倡義殿  
前御客何猖狂廣搜娥眉媚君王不管江南與江  
北且臨凝碧奏霓裳清流黨議息復逞南部烟花  
場未冷咄哉光祿巧彌縫不似紅粧翻骨骸拆鸞  
破鏡兩離分二十八字空懷君閉樓却觸丞相怒  
血作桃花扇上紋乾坤正氣漁樵有野老悲歌來  
擊缶時移事去失中原夜半將星隕如斗豈但章  
臺柳色休吳宮花草盡含愁石城一旦降旗出無

復吹簫十二樓六十年來如轉電誰將艷曲開生  
面新人權笑故人哀勸君莫唱桃花扇

聽張希齡妹丈話蜀中

君家曾在蜀中過十二巫峰竟若何終古才人生  
灑灑至今仙隱愛岷峨杜陵遺宅寒花發諸葛祠  
堂暮靄多惟有百禽朝望帝燕來鴻去滿山阿

山莊

耕雨歌風樂太平春時携杖聽啼鶯村中未乏招  
尋侶門外喜無剝啄聲曬網艇來斜照斂樵蘇人

去野雲生農翁哇叟堪閒話邀醉橋邊待月明

題扇頭虞美人草

臨難能完節芳名寄一枝迎風嬌不語幽怨有誰  
知

送東藩沙表弟

行行歸海濱執手在岐路臨別贈一言情長淚如  
雨與子托中表知心誠有素切磋互爲師得善毫  
無妬憶來方春風歸去挹清露征途迥難依連山  
皆烟樹魚書不可沉鴈帛須頻附後會自有期何

如常對晤從此十二時時時惟思慕

十七夜月

樹裏如珪月依然照碧山孤雲生際沒獨鳥夜深  
還倚劍天涯外懷人秋水間隣樓有橫吹感我鬢  
毛斑

看罷

看罷吳鈞更理琴調高無處覓知音床頭蟋蟀吟  
偏苦水底魚龍蟄自深檻竹琅玕虛夜色井梧搖  
落刺秋心緘書空寄賓鴻去知到雲中若箇尋

避地

避地何因尚俗牽每回惆悵必經年桃源不記秦  
時事杞國兼憂上古天荷鍾劉伶終化土浣花子  
美更無錢杯行合遣茫茫醉試取羲皇一枕眠

雲物樓

魯郊觀火處遺阜壓城闔瓦礫浮雲色桑田清露  
塵登臨徒有句占候豈通神我亦低徊久依依愧  
古人

又

申梅集 卷一  
搖落千秋後樓臺址亦荒豐碑埋蔓草土庫枕殘  
陽遠樹春煙合平沙鳥路長青蓮多舊迹一半在  
吾鄉

哭外父王胥庭相國十六韻

萬國驚聞逝典型縞衣重拜謝家庭從來上壽無  
千禩不覺中台隕一星正沐恩波頌几杖也緣匡  
輔損儀形採薪遂減堂餐飯伏枕猶翻

御案經麟閣後賢推矍鑠鳳池同譜半伶仃考勲  
已過汾陽筭外裔爭詢晉國齡尙擬駐顏扶舜曆

恐教騎尾別堯冀莊生謾說椿能壽曼倩虛傳藥  
有靈轉憶琴書趨貳館曾陪笑語讌頭廳翩翩子  
弟皆王謝濟濟嫺僚摠衛邢三載結褵歡恨淺九  
秋別鵠操難聽傷哉少女先晨露愴矣中闈復罄  
瓶西府賓朋看聚散東床涕淚獨飄零園開乘鶴  
誰同賞堂著青緇戶欲扃玉潔冰清遺竇桂高牙  
大燾散原鳩燕山魯水風烟隔悵望徒悲舊雀屏  
壽羅志行表叔

交梨如斗正香初竹護柴門隱者居瓦缶尙期千

申梅集 卷一 五  
日酒草堂勸晒五車書阮生樂道留青眼任叟忘  
機釣巨魚高潔不須歌令愷願將松柏紀年餘

書燈

問字連年業未成紙窻雪案寄閑情殷勤汗簡三  
冬富斷續蘭膏五夜明志苦何妨偷鑿壁家貧休  
耻借囊螢石渠閣上青編在自有仙人道姓名

花燈

蓬山吐焰擁金鰲禁漏聲催破汶漻竹馬約誰觀  
火樹香車隨處問星橋城名不夜人無睡國號長

春興自饒翠袖笑扶爭指點一春最好是今宵

客燈

北燕南越漫經年午夜搖紅淚泣然官舍怯聽朝  
暮雨水鄉空照往來船家山有夢馳天外花燼無  
憑綻枕邊每到黃昏惟仗汝沉吟旅思不成眠

戍燈

戎衣零亂斗纓斜老大宵征聽鼓笳駐馬關前防  
有警連營河上摠無譁短檠坐驗弓刀影列炬遙  
驚霜露萃却凭戍樓舒遠望鬼燐點點在蘆花

閨燈

迢迢春夜捲簾波不用清輝借月娥  
缸背影迴憐態逸衣邊光閃助情多  
芳槭寫就連愁寄紙帳低  
拳任夢過刀尺更闌殊未歇  
淚痕單照意如何

塔燈

層霄焰焰發精藍三昧光華透石龕  
貝葉就窻翻極樂袈裟趁影習和南  
層層滅現當秋寺點點微  
茫印夜潭莫把迷津他處問色空  
合向此中參

漁燈

欸乃寧辭煙水勞寒星萬點散江皋  
昏黃射水驚龍窟明滅臨洲見鷺毛  
弄笛已沉南浦月補簑閑坐海門濤  
却看蘆葦深深處光聚圓沙鴈正號

山燈

珠光何意上峰頭照徹重巖疊嶂幽  
隔霧一星傳午夜臨崖數點散陽秋  
極知野寺無銀燭飽識青  
燐綻碧油只恐五更俱滅盡涼風  
天末使人愁

咏雪效東坡尖叉韻

初看窻外白簾纖更訝天公亂撒鹽  
埋沒平蕪時



中樓集 卷一  
蠹起如何山頂忽無尖

又

六出成團亂舞鴉着枝冬月有梨花詩腸想被清  
寒凍要待吟成手八叉

再疊尖叉韻

無那寒威一夜嚴起看梅蕊若爲添祇因眼底茫  
茫白更遣酸風別樣尖

又

不住虛空糝白沙茫茫銀海正無涯隔窓掩映明

如月下盡梅簾不用叉

上巳日雨

樓頭坐雨意從容不比清明路上逢耳畔送來聲  
細細階前已覺水溶溶懸知野店愁行客莫遣寒  
潭起螿龍花外縱教他日霽香泥猶礙馬蹄衝

季桓子井

卽掘得羶羊處

今魯北門墟荒榛雜煙霧昔在三桓時季氏之所  
據僭奢何崔巍甲第蠹當路於今斷井埋宅里迥  
非故剩有石甃梁指得土在處中藏類似羊怪瑋

駭人覩詢之

大聖言窮博始相悟曾經日月感春雨復秋露乘  
氣乃成形精華所結聚人非物已非井尚千秋著  
猶有冷枯泉暗逐洙流注我來捫殘碑躑躅不能  
去

贈沙南蒼表弟

一番離別見彌親誰似吾儕意率真莫把炎涼憑  
末路好將高曠侶先民珠生大海元無價玉蘊深  
山定有神壯歲丈夫期豹變知君非久滯風塵

胡母吳氏貞節詩

殉夫何似撫孤勤杵臼程嬰萃一身曾見授緹香  
閣裏今看畫荻楚江濱松筠堅操無前古麟鳳飛  
騰有後人論定蓋棺君不愧九原重叠被絲綸

石門山

春山屏跡遠囂煩一片晴雲竟日暄忽憶少陵詩  
句好自尋澗道覓真源

又

滿架藤花夾柳枝金銀餘氣約春遲野人指點張

家谷想見高人遠害時

哭在菴八叔

平生事業轉頭空還與浮漚聚散同連袂數年金  
谷裏斷腸一曲薤歌中百齡久遠誰能俟二豎荒  
唐不受攻昨日今朝成永訣淚沾衣袖盡殷紅

又

談笑曾輕濟世才浮生何促賦歸來草堂自此無  
春色酒伴還應覓夜臺華表鶴棲他日事承塵鵬  
上路人哀向平婚嫁成遺恨不獨歆余奠一杯

偶題

瀟湘臨北牖爽氣來晴壑心靜覺長年橫琴看秋

籟

又

江上秋風清山間涼月白古今一慨然鶴夢通幽  
客

贈邾城令田幼乾

官曹清似水案牘不相縈拄笏看山色彈琴答澗  
聲鳳凰當署集猛虎渡河行密邇賢良宰期年政

化成

上嶧山

不獨山光好還貪石態奇  
草從秦代剪松是漢朝  
移隱者門庭僻仙家日月遲  
何由撥塵網來此卧  
經時

元宵感舊

客歲茲辰引興長  
筵前檀板奏霓裳  
梨花夢裏人如玉  
柏子尊中月似霜  
巫女雲來原是幻  
洛神波去總成荒  
祗今回首增惆悵  
獨對春風暗斷腸

又

碧月紛紛過女牆  
佳人挈伴正飛觴  
多因竹葉橫來影  
不待梅花送到香  
曲徑有時逢綽約  
小樓容易捉迷藏  
如何此歲愆期約  
好夜良天各異方

寄題池州杏花村

江南春二月何處無杏花  
如何杏花村名獨在九  
華輕寒拂面至振策尋酒家  
遙巷犬吠聲隔樹青  
帘斜及茲速沽飲花暖風日嘉  
我雖未能到聞此  
興亦遐小杜爲使君美政  
誠足誇訟庭清若水四

郊足桑麻遊春聊過此得句良復佳因之傳千古  
觴咏日有加尋常村落中側帽策驪駒逕去不復  
顧回首惟雲沙何獨愛茲村茫茫思無涯村以人  
得名久久無疵瑕靜尋流傳理令我長歎嗟

分詠林居

主人爲愛林堂趣卜築松間野况多繞砌春華呈  
艷色橫窓秋月送金波常憐夢穩風驚曙不厭雲  
流鳥解歌贏得此身同謝眺一聲長嘯出烟蘿

秋花歎

花事有始終人生有壯老年光判榮瘁卉木分壽夭  
天當春媚陽和桃李色姣好芍藥占夏初芙蓉艷  
池沼節序苦相催未幾忽秋杪獨有黃菊存羣英  
悉枯槁慘哉西風意併此欲俱掃堅忍傲霜心獨  
立以自保猶虞太枯寂百畦齊放葆黃紫爛紛披  
粉白鬪奇巧終爲人所憐引之入堂與高下均位  
置向陽必杲杲或有弱質存杖扶免傾倒陶令愛  
成癖九秋足吟稿寄語後世賢斯意乃古道彼美  
誇春榮焉能媿貞操歎息蘭芷間識君若不早

泥美人

傳粉依然兩鬢青  
明粧實個好儀形  
美人自古皆黃土  
留取無言倚畫屏

又

如顰似笑本無聲  
不似盧家有姓名  
百喚未曾迴一顧  
任人終日喚卿卿

又

風吹如動畫羅衣  
只露柔荑一寸肌  
背影鎮常燈後立  
不容約畧試腰肢

又

榻上橫陳見玉奴  
睡來難倩手相扶  
一生摠在襄王夢  
若說行雲事本無

仲連臺

重臺峩峩高百尺  
翠栢丹楓落秋色  
人云此是仲連樓  
千載峻嶒不歆側  
君不見信陵救趙兵  
君不見梁王帝秦使  
竊符卧內豈英雄  
僕妾甘爲誠短計  
先生立折強秦兵  
不受平原十五城  
解粉排難本餘事  
豈爲生前身後名  
四君門下三千士  
試問

申樹集 卷下  
誰甘蹈海死先生浩氣空乾坤輕世肆志良可矣  
聊城一箭功遂收俎豆先生居上頭蘇張掉舌徒  
取印對此寧能不自羞

白燕

不逐烏衣隊冰霜別鑄顏無心度雪嶺有意剪青  
灣背日身疑紫酣霞羽暫殷偏宜珠箔底難辨素  
屏間暗楚梨花落微牽柳絮還何慙秋鷺潔羞着  
鷓鴣斑似獻周公雉應啣楊氏環晶光欺月冷皓  
質並鷗閑夢豈離瓊闕巢堪占玉山藥宮聊信宿

琪樹定躋攀避社輝銀屋衝炎照百蠻賓鴻渾未  
識休度玉門關

獨山湖泛舟

未識江湖趣今知泛宅幽幾回徐放棹如不欲行  
舟岸影烟中迥山光草外浮榴枝紅五月蒲渚綠  
千疇沂泗通天漣曹滕據上游清襟舒眺望爽氣  
豁心眸島嶼依沙列雲霞過眼收潛來知魴鱸遙  
集是鳧鷖浣女凌波渡鮫人杜若洲月升方覺晚  
風過欲成秋橫槩添新賦傳觴得舊儔酒人逢畢

阮詩客有應劉我亦耽清况俱宜散旅愁潯陽曾  
夜汎懷古重悠悠

癸未早春卽事

柳湄寒威放未齊東風如籟咽青溪鶉衣箇箇三  
春淚鵲面家家五夜啼荒壟晨來惟雉雉空村日  
午不聞鷄行行莫謾尋花事縱有清樽孰與携

又

江淮蠲賦奏章題安得 天恩及竟齊漠漠平蕪  
空雁落茫茫烟水任烏啼賞春難辦青絲履鬪草

誰簪紫玉笋遙想鶯花榮上苑悲歡真已判雲泥  
有懷燕山陳健夫

嘯傲王侯坐悠然別有懷詩人無與敵酒侶孰堪  
借尙想瑤華寄思爲泉石儕何時賁東魯留句咏  
唐槐

寄答何義文

日下知名士河干效策來負轅稱驥德焦尾識琴  
材枚叟觀濤去山公載酒迴吟詩多遠興官閣好  
題梅



物化

北溟有鯢魚一旦化爲鵬如何飛飛雀入水蛤方  
成蜣螂糞丸轉蟬翼又何輕蠶抽緒絲盡蛾乃脫  
繭形旣云鷹化鳩復云鳩化鷹鷹鳩互相化何以  
有死生凡此物化理悟者誰其能

又

伯繇被舜殛入淵化黃能輪菌復三足將以鎮水  
災虎與人異性化者有牛哀不復識故人吞噬恣  
雄材望帝化杜宇羽毛日摧頽盡忘爲君樂但勸

人歸來凡此人化理終古費疑猜

又

太古多桑田於今變滄海蓬萊金銀闕滅沒倏何  
在蜃樓與海市偶爾炫光彩雨氣成虹霓攬之不  
堪帶日月化豺虎昔人曾爲恠南山松蕭疎忽作  
石磊磊君子猿鶴去小人沙蟲邁萬化良盡然令  
人生感慨

春日浮香亭步杜工部曲江二首韻

柳眼桃腮各媚春拂衣聊作冶遊人自臨淺沼輕

申機集 卷下  
投餌更試清簫漫動唇此日亭中翔燕雀當年郭  
外走麒麟等閑領取浮香意且樂樽前現在身

又

小小芒屨短短衣臨沂好景便忘歸沙明地迥溪  
雲合軒殿天高岸樹稀舊犬亦知迎客喜閑禽故  
斃落花飛斟量幽事還愁少莫使良辰與願違

惜花

望中春色已無形綠意紅情特地縈寄語花神休  
悵別爲君留樣寫丹青

又

情知烟柳織成愁手挽長條醉未休可惜嫣紅與  
淡紫薰風纔至一齊收

又

名花艷絕擬嬋娟不見無緣見有緣一片素心常  
護汝恐教零落委尊前

又

寂寥無處不殘紅都入離人淚眼中回首園林春  
事了關情猶有舊東風

竹

無可談心者空齋日對君根應憐舊籜尾亦拂高  
雲不負子猷興深諧稽阮羣蕭蕭獨撼處留影碎  
斜曛

初夏禊事集東園此地森木交加菜畦麥隴  
一望葱翠遶以流觴曲水頗有蘭亭之致

各做古體分賦紀之

閑園屏囂境老樹排官路稠陰漸蒙密曲池亦回  
互時鳥將變音輕雲若流素紅英墮欲泣碧草生

猶怒豈必在郊原方可閑余步夏令今始交春光  
忽他赴似雨兼似晴非烟更非霧紆流偶湍急廣  
茵復踈布觴來當引滿箋至宜作賦歲何春不夏  
物何新不故鶯簧方喧晨蛙鼓又催暮快追蘭亭  
咏何羨金谷富懷古衷腸熱興來肝膽露各據  
石床長吟不相顧

無愁詩

白玉堂中跨紫騮生年十二拜通侯催粧喜得無  
雙艷賜第新成百尺樓柱上明珠懸不夜苑邊香

草號忘憂景平日久長為樂已閨青春復閨秋  
夏卉十二咏

杜鵑

紅雨點春山首夏方未歇汝非望帝魂胡為亦啼  
血

虞美人

亭亭愛惜墀獨立色姣好露眼為誰啼重瞳不相  
保

十姊妹

約伴闌新粧粧就喜相見不似漢宮時合德妬飛  
燕

夜合

芳樹殿春陽絲絲帶晚香枝頭綴羅綺葉底宿鴛  
鴦

宜男

移向北堂栽丹霞淺淡色宜男更忘憂兩兩佳名  
得

安石榴

丹竈熒熒火何時上樹燃紅裙怯見汝生妬不生  
憐

洛陽

牡丹雖富麗猶避洛陽名小小欄邊種偏縈故國  
情

魚子蘭

蘭身本非魚魚子亦無數化爲萬斛珠年年滴香  
露

夾竹桃

不屬武陵種盈盈態亦饒千年不結實花寄碧筠  
梢

虎耳

花葉甚微細徒然名虎耳垂垂亂石間側聽山風  
起

錦帶

滋蔓皆金色穠華壓折條何論寬與窄摠繫沈郎  
腰

松花

申柳集 卷十  
箕踞長松陰漠漠待花落雖未足長生餐之勝藜藿

久雨初晴三硯齋盆蓮盛開同人快集分賦  
人花方寂寞霽後兩相宜各覓披襟處如看出浴  
時月娥辭紫殿姑射下瑤池共踐香山約分箋一  
索詩

又

蚤起神爲爽軒窓也復清共君譚竟日自覺快生  
平香襲輕紈細花聯小院明連朝無此况樽酒倍

宜傾

聽秋聲

白帝司權炎帝却商飈度處輕陰幕肅然四野來  
秋聲客坐聽之雙淚落始焉啾唧牆下起漸入衰  
林濃葉底或如細語窓牖間忽作悲啼晚風裏是  
誰擊碎花間鈴敲金戛玉來縱琤因風吹與衆籟  
合天地爲之亦悲鳴傷秋宋玉徒感切登樓王粲  
心如結夜久無人與共聽惟有樓前一輪月

了語

枯鮒涸轍中更值車輪碾紙鳶飛上天忽被風吹斷

又

佳磁置書齋擊鼠與同碎如意叩珊瑚迸作數千塊

不了語

旱天枯槔響遠戍晚砧聲思婦高樓上年年離別情

又

螻蟻緣磨盤旋轉終復始扁舟溯長江逆風程萬里

分詠秋驛 得十蒸

古道行行力不勝天高爽氣復澄澄村容斷續拖殘柳山態離奇掛老藤旅雁南來如有約征驂北去杳無憑百年強半為羈客感盡人間廢與興

冬日有鵲百餘飛饒園林

蕭疎園圃蒼翠山古樹落落生其間不知鵲巢在何處今始倦飛知所還遠從別嶠成團至遍集亭

南亭北樹我園果實已稀踈飲啄無餘那能住村  
人競言鵲報喜賀者紛然動遠邇豈知鵲噪本無  
心或是來依主人耳野外天清肅氣高正當鷹隼  
搏雲霄禍機在在不可測傷羣離匹將焉逃主人  
雍容命賓友寄意惟存詩與酒階下時觀鳥雀馴  
息馳罷獵弛鷹狗况此茂林修竹間甞甞麋鹿皆  
安閑飛鳴盡日何所懼不似世途長險艱古松之  
陰斷岸角欲與羣鵲永期約鵲不知余何所樂余  
之不知亦如鵲

閑集亦雨軒讀宋詩至酒徒飄落風前燕詩  
社彫零霜後桐之句因憶顧天石張損持  
宋雲生錢漢文羅士巖章昺可葉孟端諸  
子兼懷錢方蓼羅承公毛艾仲孔墀來皆  
成古人不禁一時聚散之感

憶昔梁園雅會同別來踪跡各西東應劉分散天  
涯外稽阮凋傷夕照中道遠幾曾馳鴈帛人亡空  
自檢詩筒離愁細數盈千斛拍損欄干意未窮

行樂詞



行樂年年興不孤春三二月遍提壺琴從金谷園  
中借酒就臨邛市上沽偶覓良朋如阮籍恰逢美  
女亦羅敷歸來駿馬馱殘醉更倩纖纖玉手扶

讀明李文正公篆新廟詩有感

所愧爲丈夫茫茫類無識束髮事詩書此志非日  
夕淵源家廟地累代藏金石檢點斷碣中始得茲  
篆刻西風捲莓苔凜凜見古色廟庭昔頽敗公實  
起潤澤留詩寫精工輝我金絲壁珊珊戛玉鳴落  
落清廟格蔡邕不能過李斯亦歎息及茲撫讀間

令我神悱惻哲人久云亡名筆難再得後來縱有  
繼奉此爲法則仰觀丹雘新敢忘斯人力用誠子  
及孫百世飲其德

叔父綠藤軒新齋告成

自得軒楹敞悠然樂可偕琴書方布席蘭蕙已盈  
階對月來吟興邀朋縱酒懷阮咸無個事判醉作  
生涯

送燕

養得雛成別畫梁舊巢泥迹尙餘香明年會有來

時候住過三冬也不妨

又

來去匆匆爲底忙就寒辭煖意堪傷海邊多是蘇  
卿窘不及南中王謝堂

夜聞榨酒有聲因而成詠

初見糟床足解憂俄聞滴瀝反成愁渾疑靜夜銅  
壺注更訝窻間急雨流吏部早知嘗有日步兵深  
愧睡無由相如獨向文君笑一酌還應渴病瘳

和許復陽鏡中見白髮

何須深感二毛生鏡裏風華豈解情老大盡從勤  
苦致踈狂休與少年爭速宜詩酒拚爲樂况有田  
園尙可耕自古山中留宰相長鏡須辦斲黃精

秋砧

萬戶連聲急閨中戒早寒素衣初澣薄香杵半敲  
殘一夜驚秋夢孤幃泣鏡鸞可憐蕩子婦羅袖未  
曾乾

和叔父元日試筆

律轉陽和氣象新布衣蔬食未全貧稱觴家慶惟

強健蠲賦 皇恩及早春鳩鵠關心催歲序鶯花  
無恙度庚申拈毫最可消愁劇百事捐除醉一旬

淄川道中早發

棟花香裏餞歸春信宿風光寄此身漠漠山田飛  
雉雉依依官柳昏征人露從晞後猶沾袂酒未沽  
來想入唇回首琅邪何處是亂雲堆裏一迷津

有所思

我亦有所思君亦有所思君思有定所我思渺難  
期思在山之麓山麓多嶽崎思在水之涯水涯長

瀟瀟思欲叩天關思欲窮地維人生不滿百萬慮  
徒奔馳悠悠望圓月月圓能幾時撫膺三嘆息今  
我欲何之

憫旱吟

太歲在甲申序當蕤賓月青陽徂朱明不聞殷雷  
發終朝望甘雨杲杲惟白日所慮行潦乾詎知高  
原裂沴鬼乘其間肆毒遍城闕病叟泣路隅白骨  
橫溝洫三旬無一飽百家僅存十聞官暫開倉奔  
赴踵相接解衣換斗升糠粃猶未脫捧持若珍珠

申梅集 卷下  
猶恐遭劫奪饑烏敢窺祠餓殍竟林立一身雖幸  
存婦子命已畢或云俟秋成稼穡焉可必隴畝半  
荒蕪耕者旋復輟誰能呼商羊爲掃此旱魃咄哉  
二妖氛濟惡難盡述何時興雲雷災稜皆殄滅惠  
彼孑遺民終年庶安業

七夕感興

忙殺天邊累鵲橋雙星無寐夜迢迢滿身風露愁  
將別送巧何人下九霄

又

瓜果堆盤一炷香穿針樓上拜銀潢不如學得牽  
牛法軟草平坡睡晚涼

中元卽事

聞說中元稱鬼節家家設斛試河燈儒門不解盂  
蘭會一樣中秋賞月明

又

回首高城隔翠烟玉池水滿月輪圓青娥大有驕  
人意似博山公買笑錢

題明皇按樂圖

鶯啼恰恰三春暮韋曲繁花正無數明皇在御值  
時平花萼樓前翠華駐五王毬馬既已豪三姨第  
宅尤誇富一時聚會浴溫泉急管繁絃喧不住初  
傳小管幽王吹旋命羯鼓花奴助永新按曲懷智  
彈霓裳新調皆自度曲罷恍然月殿遊不惜全身  
在風露忠讜朝臣日見踈樂妓伶工會趨附日費  
纏頭幾萬金但願曲中博一顧焉知忽動漁陽兵  
野鹿狃狃恣號怒哥舒老將旣生降烽火夜達驪  
山路倉皇大駕出西巡六軍不發流言布玉環命

墮馬崑坡流落伶官不知處霓裳羽衣不復聞聽  
雨淋鈴淚如注留取此圖鑒後人家國興亡亦可  
覩

晚浴

蘭湯拭罷掩房櫳細膩膚光自不同荏苒春葩新  
過雨輕盈盈秋葢乍含風幾圓欲入鮫綃帳未肯重  
來葢蕊宮分付檀郎休轉盼恐增涼夜意無窮

試衣

一捻盈盈碧玉姿幾番量度小腰肢輕籠翠袖常

雙挽薄疊羅衫要四垂漫惹飛花春半後恐沾別  
淚夜涼時由來新故分縑素寬窄傍人豈預知

凝思

寂寞如啼又似顰晚來愁殺倚粧人可能無事縈  
心曲剩有多情弔影身幾日得偕蕭史伴何年曾  
傍宋家隣個中恐洩閒消息不語聊爲惜去春

午睡

花底迷藏日幾回柔腸忽被倦魔催欠伸取次同  
眠柳倚徙無心嗅落梅引夢去遊蕉鹿館隨魂却

過雨雲臺髻傍誰報金釵溜星眼含嬌未易開

長干行

郎家長千里妾住莫愁湖兩小不相識借問有情  
無一從十五嫁自把脩眉畫但願守閨門常羞作  
遊冶郎行逐利名千里去南荆妾閉紅閨裏年年  
傷別情妾傷不可道郎行須自保遊遍楚章臺爭  
如在家好今朝書到家郎已發長沙凝粧待郎至  
笑折宜男花

落花

已逐東風嫁長和綠樹分飄來疑蝶粉望去失梨  
雲燕蹴驚還見鶯穿靜不聞爲君置樽酒遙與餞  
離羣

五毒詩

虎蛇蟾蜘蛛蜈蚣

虎爲百獸之豪雄其在五伯桓文同虺蛇雖毒乃  
其次略具鱗甲難爲龍况復蟾蛛何足數百脚僭  
誕徒稱公彼蛇尙莫肯與伍虎眼視之猶蠖蠓例  
稱五毒誰品第令節恰遇今天中日麗中天百恠  
懾五物尤秘藏其蹤有似大禹鑄九鼎神姦無復

山林逢大人御世宵小避避荒屏跡姑包容始知  
至化不可窮佑彼衆善祛羣凶猛虎降體侶細蟲  
敢恃平日之豪雄其餘四毒更相制驅出天外隨  
薰風

謂蛇制蟾蟾制蜘蛛制  
百脚百脚更制蛇也

書白樂天傳後

樂天與楊虞卿爲姻家絕不昵于虞卿交  
元稹牛僧孺稱莫逆不黨于稹與僧孺爲  
裴晉公所愛重不因晉公以進李文饒素  
不喜樂天不爲文饒所深害處世若白公

足以法矣

合無偏黨憎無憂終始謀交得自由此老襟懷全  
直道羣公冰炭等虛舟每逢詩酒身常在歷盡升  
沉了不愁千古才人亦何限吾師惟有白江州

五全莊避暑忽聞雨聲驟至此數月以來僅  
見者各拈一韵志喜

軒楹去郭任樓閒涼雨初來暑氣刪盡日炎熇枯  
泗水一時雲霧擁防山憂人禾黍今忘却命我琴  
樽快解顏蕉葉北窓頻送響何妨沾濕夜分還

田園

三間茅屋穩一噓菜根肥堪傲朱門客高眠省是  
非

又

業是武陵業歌同擊壤歌暮雲看不厭更聽鳥聲  
多

又

長隨蛺蝶叢閱遍籬花發無事覺春長負檐恒待  
月



又

耽我村墟樂長無城市塵客來時小摘溪欸所情親

伯禽望父臺

魯門北郭外堪與眺周京誰謂分封後能忘陟岵情  
荒荒秋月照咽咽晚蟬鳴坏土猶如昔田夫不敢耕

亦雨亭對巖菊

幾處離披望眼迷石欄山麓草堂西繁枝傲骨迎

霜現晚節幽香趁月低綴席每邀高士賦橫簪宜  
上美人筭秋光易老秋心苦有酒還應早共携

難忘是花下

難忘是花下因花饒嘯歌來頻無厭數坐久更婆娑  
香國知音少芳魂入夢多苔茵重叠軟竟醉意如何

又

難忘是花下昨日舉盃盃未恐匆匆落爲余細細  
開不愁朝雨濕惟怯晚風催但得生新與何妨屢

醉圃

時興詩用盧子諒韵卽效其體

玉衡轉仲冬陰氛滌寥廓言念千里人棲遲在藜  
藿昔書邈難寄杳杳隔川洛胡爲久濡迹無乃衣  
裳薄嘈嘈寒雀鳴漫漫雪花落撫景增太息羣離  
居又索飛觀遠無際林表夾巖嶸展此別後思懶  
爲招隱作久久恐時晏愈令傷寂寞

柳眼

搖漾輕絲惹倦容醒來猶記夢重重微窺已識春

來到斜睇還如客乍逢太液池邊方睡穩灞陵橋  
畔最情濃星星自有常青處會意詩人屬戴顓

訪王壽熙

頭白蘇門侶年來共討論清歌時不倦偶畫亦堪  
存茆屋延知己山花有酒尊携將郊野况與爾話  
高軒

感志

俠槩何勞問狗屠百年身世且提壺要求白壁克  
梁棟休買胭脂點畫圖泉石幾人能利濟詩書原

不尙豪麤平生養就珊瑚釣直欲悠悠寄五湖

擬曾皙遊沂水舞雩歸來詠

我所思兮感今古之異時生茲世以徜徉兮古人  
忽焉以去斯撫景物之融和兮感造化之無私今  
日暮以遄歸兮復逍遙而何求樂吾行之舒舒兮  
各掉臂以行遊羗不知何所底止兮循沂水以言  
歸我旣樂夫古處兮薄言振吾春衣周道如砥兮  
聽人之去來沂之水清兮予將從此乎溯洄

春江花月夜

粼粼綠水壓江城花正紛披月復清天上圓虧非  
造次人間開謝自分明留詩莫讓顏光祿舒嘯應  
追阮步兵已買扁舟乘夜色久拚身擬白鷗輕

夢先慈張太君

自抱終天恨於今廿七年承歡常夢裏慈訓似生  
前反哺嗟何及含飴獨泣然醒來空記語腸斷蓼  
莪篇

弔西陵蘇小

十三女子擅西陵花落烟消嫁未曾歌扇至今搖

絳樹舞裙猶似閃春燈一原茂草風吹雨三尺荒  
塋棘掛藤昌谷有詩誰解和芳魂長隔亂雲層

遊仙詩

雲爲冠珮月爲裳太乙遨遊此路長綠竹陰中逢  
阮肇碧桃花下遇裴航曾經海外烟霞異未覺天  
邊歲序忙小駐鸞旌空翠裏自斟名酒勸東皇

又

玉女窻扉一樣春但餐瓊滷駐精神始知函谷騎  
牛客不及秦樓跨鳳人綠字赤文燈下舊琪花瑤

草鏡中新古來仙地皆情地張碩蘭香別有姻

重刊先世北海集有述

曹瞞柄漢政劉氏頽三綱豈無名流士大雅皆淪  
亡遐哉管幼安皂帽去遼陽咄嗟華子魚末節何  
猖狂其餘建安子仁義志久荒草檄愈頭風借面  
以甲喪碌碌何足數誰爲聲價昂列祖北海公風  
厲不可當矯世敦古道獨論盛孝章觀其友禰生  
抱負豈尋常裸衣罵廣座撾鼓聲悲涼非公孰具  
眼彼此相激揚瞞也狐鼠儔公真威鳳翔當其未

申梅集 卷下  
遇害漢祚固無傷曹孔不兩立薰蕕互相妨惜乎  
時不遇盡室竟罹殃太阿雖屈折不失爲至剛三  
復此遺編使我增慨慷斯文在異姓固當爲表彰  
况乃先世賢遺琴猶在堂梓之附家乘用戒永珍  
藏

贈表弟沙西京東藩

尚書舊望本清操又見人龍屬汝曹才子獨凌星  
斗氣家聲何忝戟門高握中珍重雙虬劍雲外飛  
騰兩鳳毛多興莫辭千里隔頻來花底醉醇醪

村夏卽事

不嫌地僻纔容膝且學貧家生事微斟酌殘杯呼  
果栗踈狂一半爲忘機

又

小雨絲絲送麥秋蠶成繅罷百無憂相携婦子鋤  
瓜去餘興提壺醉陌頭

又

曲籬深岸護松杉隔水笙簧韻不凡處處野風誰  
領受青鞋黃帽白蕉衫

新得小舟

南池疑似小江鄉又喜初成一葉航  
雨後渡人歸水榭月中載酒下橫塘  
鷓鴣見慣無猜貌魴鮓時來有熱腸  
好在半篙新霽後泳游曾不礙荷裳

讀樂天無可奈何歌

造化本多忌鈞陶難劑和英雄歸黃土  
寶劍埋青莎鶴脛恒苦長蜺足徒自多  
鸚鵡稱解語無端被網羅更使古仁賢窮餓死  
山阿盜蹠偏享壽報施一何訛物理總不齊  
紛雜浮雲過天道固無親人

心難揣摩一日十二時時時足風波我欲酬壯志  
年華忽蹉跎安穩若泰山終然易消磨三復樂天  
詩悲哉無奈何

春日感興

春去春來肯息機年年空自占芳菲  
洗殘脂粉歸梨夢費盡丹黃染蝶衣  
蜀黛蘸波疑欲滴楚腰纖瘦不勝饑  
誰憐麥隴荒烟外閱遍興亡一雉飛

卽席

河縣花常發梁園月最明  
艷歌徵絕妓高會動名

申梅集 卷下  
卿夜久拋簪鈿春寒語燕鶯金牌無數下合坐促  
詩成

贈醫者

傾蓋瞻顏色聞言一往深未舒醫國手已驗活人  
心洗藥泉香井看花杏滿林知君身物外靡不受  
塵侵

村曉

遠眺前村古徑斜朔雲重疊不曾遮河乾祇剩冰  
爲骨葉老唯憑雪作芽落落布碁沙上雁踈踈點

墨樹頭鴉嶺南歸騎如相報應說寒梅未放花

當窻織

機傍有聲何唧唧貧家女兒當窻織可憐老大不  
嫁人阿母課縑日一疋晨昏玉腕不停梭中夜流  
黃機未息機有聲妾有情恐教窻外年華去博得  
機中雲錦成雲錦成淚如雨但教贈與有情人何  
惜千絲復萬縷

飲馬長城窟行

千里築長城長城一何遠我馬疾驅向北馳中道

渴死何人管嗚嗚角陣前起後軍已至前軍喜  
相期策馬努力前共飲長城窟中水嚴冬十月冰  
雪寒塞草枯焦泉水乾此時人饑馬亦渴何由得  
達祈連山長城之馬半生死築城健兒可知矣願  
寄尺書到閨中勿復更望生還子

秋風征鴈篇

爾從朔方來心膽一何怯情知弋者多江湖不易  
涉朝飛青冥裏夜宿暗城堞作字勢相連啣蘆尾  
相接月明洲渚間形影必自攝雖常抱沙臥未敢

交目睫不如梁間燕肆志隨所集嗟嗟客異方風  
水固難習年來稻梁稀一飽嗟莫及不如守窮邊  
庶得免兢業

擬

聖駕南巡過松江道經孔宅留題敬賦志盛  
天王時邁指江濱更向吳中問聖人昔日曾聞環  
璧堊今朝欣觀品題新迴廊延蔓琴書靜古殿陰  
森檜栢春欲使宮牆貽遠澤故將綸綍示尊親  
喜顧天石復來入會



虎頭別我去何之且喜重來快論詩  
照坐朱顏非昔日凌雲健筆勝當時  
楚江香草留題遍燕市黃金買價遲  
歲晚不須愁寂寞雪堂還有酒盈卮

又

童穉論交二十年知君意氣薄雲烟  
都無冰炭縈心曲但覺王侯可比肩  
晚歲舌存猶自捫囊中詩好不  
求憐防山泗水居堪卜試問梁溪路幾千

贈章鼎可新授家學學博

何必勲名勒鼎台青瑣一片借雄才  
孔顏樂處羹

牆見鄒魯文章與窆開近日詩篇逾俊逸  
當年時命偶遭迴傳經得暇頻過我  
正欲巡簷問早梅

咏史詩

秦皇謾遣樓船去不見仙人海上迴  
堪笑他年痴漢武又憑方士問蓬萊

又

曼倩通身是滑稽金門避世本權宜  
後人錯信荒唐話只道曾遊王母池

又

申梅集 卷下 四  
遍築高樓號望仙清齋祀竈在甘泉如何脫屣輕  
天下更拓邊廷路幾千

又

萬里黃雲朔雪天李陵臺近黑河邊漢皇不早求  
蘇武屈在羊羣十九年

又

相如詞賦動君王幸得同時僅拜郎亦似文皇空  
拊髀老來猶未識馮唐

又

不冠寧見老平津憚見長孺伉直臣他日千秋超  
拜相可能功業勝前人

商婦怨

苦莫苦商婦悲莫悲遠別結襦十五年衾枕不曾  
熱貨利相催去杳然就行役宿水復餐風辛勤漸  
華髮君在天一涯妾守空閨闈縱欲夢見君焉知  
路曲折茫茫秋風生長夜寒凜冽轉輾不成寐起  
視中庭月月固有圓時妾獨百歲缺臨江弔清淚  
江水爲嗚咽曾托琵琶絃代作苦語說徒傷貌憔悴

粹空使心斷絕今無白司馬誰解青衫濕抱怨以  
終年悽愴難再述

志士吟

沐猴衣冠深足耻黔驢雖大易與耳草蟲鳴則阜  
螽躍離虎嘯而清風起人各有志何可量觀物須  
當究其始君不見平原十九人君不見田橫五百  
士公等碌碌皆虛生不如同日蹈海死我歌志士  
吟惜哉無知音灌園仲子徒高潔誰識南陽抱膝  
心

早春喜雨

大造恩膏沛中原旱魃刪石田隨潤轉生意逐春  
還端霧籠千樹奇雲湧四山灑窓纔浙浙決霽竟  
潺潺柳外愁乾鵲江心喜白鷗但令歌稔歲何惜  
掩柴關已慶災黎活仍聞玉粒頒晨興如快霽相  
引浴沂灣

觀釣

雨後輕颺蕩水紋不知湖外夕陽曛青簑尚泣荷  
邊露短棹斜穿澗底雲少日心情雖似減此時幽

與與君分脩然兀坐忘筌後也復臨濠意出羣

隔岸有所見 六言

岸北岸南樹碧亭前亭後花嬌誰家樓畔斜倚脉  
脉琴心暗招

又

羞見蘭橈頻過似憐花影難攀半掩白團扇底爲  
誰微蹙春山

秋露

吸飽寒蟬濕盡螢草根終夜獨冷冷顛于玉女窻

前滴故向銅仙掌上零蘭眼暗啼宵淚積荷盤盛  
重曉珠停瓊天半合能醒醉誰識東方是歲星

柴門曝日

跌坐衡門下暄和任所耽繩床當淨几積草代溪  
龕鷄上危垣北鳥啼小樹南喜無橫吏到閑共野  
農談

又

草草難圖畫惟堪靜者俱真成岸巾幘更擬脫衣  
裾有客來同曝清談不及書持將獻天子吾樂更

何如

再和坡公尖叉韵

旋從天外見廉纖六出憑陵朔氣嚴旭日緩消楊  
柳絮密雲重護水晶鹽肯分貧士吟長夜帶與樵  
夫入短簷盡道馮夷和玉女機峯相鬪在山尖

又

枯木昏昏破曉鴉望中不辨白牛車幾層幽澗鋪  
瓊屑是處高枝綴玉花凍合濃雲埋地軸光涵遠  
陌露人家坡仙刻苦思能到袖手微吟未肯叉

送窮

人生宇宙間窮者十八九原思與范丹所在無不  
有釜中既生魚衣底或露肘柴門不能設誰復關  
戶牖晨起視蕪菁盎中乏升斗迫呼吏猶至典鬻  
到鷄狗稱貸誰與憐面目看亦醜凡茲陋室士多  
半屬親友我雖不云窮窮味諳已久今茲歲除夕  
當置送窮酒舉杯代之言窮爾盍散走我欲屢干  
間廕彼茅屋漏我欲粟萬鍾爲之具芻豆我欲縑  
百端界以代文繡我欲捨囊錢盈彼盎與缶能令

白梅集 卷下  
衆貧兒戶戶稱紅朽爾尙廁其間還知愧作否窮  
聞大笑喙君言一何謬彼窮乃清福甘分隨所受  
與予相習慣不復生詈詬君願則已奢彼病焉可  
救貧富難均平徒使肥者瘦君若踐此言吾當隨  
君後

送澍萬叔祖之任衡陽

最績秋曹後啣恩綰郡符錦衣旋古里彩鷁下江  
湖經術師前輩風雲入壯圖冰霜操獨凜琴鶴興  
非孤湘水通天壑衡峰鎮地隅一帆烟嶼遠九轉

嶽形紆漢節威靈屈蠻荆習俗殊香盤知擁戴竹  
馬亦歡娛拭目觀新政傾心服魯儒雁迴應有信  
頻寄莫躊躇

喜家東塘戶部歸

憶從奉使到維揚天下才人識岸堂兩轉戶曹仍  
隱吏十年京邸一琴囊蒲輪異日知重召松徑深  
山幸未荒且得共君頻酌酒破除詩債論耕桑

又

詞壇聲價與雲齊名滿京華被謫宜歌就自成紅

申柳集 卷下  
豆譜客來頻醉綠藤蹊歸遺老母餘清俸乞得閑  
身灌小畦不俟湘江春草綠鷓鴣啼罷又鶻啼

懷許南交

許子才華久愆期尙草萊留詩辭闕里賣賦去燕  
臺馬首今何向魚緘客不來還披舊花鳥生面若  
新開

晚霽

人情厭久雨我亦愛新晴暑去園林碧秋來枕簟  
清晚虹猶滅沒弦月自孤明簷溜今宵歇惟餘促

織聲

暮春西園主人招飲水南莊同陳力菴章鼎  
可李爲龍許復陽羅志行家璧六東塘慎  
先大光西銘弟分賦

去郭投閑結一菴飛花飛絮滿澄潭四垂雲護春  
城北萬點香飄畫閣南顧渚早茶金液沸涓濱新  
笋玉條叅今朝也似西園集走筆詩成已半酣

懷舊詩

崑山曹鹿野

申梅集 卷下 吳  
老友多凌替斯人亦沉淪童蒙事聲偶裴几最情  
親談笑每忘倦形骸尤率真往往不衫履塊同泉  
石人君有幕府才何往非上賓遂辭東魯去後會  
邈無因何期死生判扼腕成悲辛聚散固難知修  
短不可論生平坐卧處罄欬恍猶存欲覓身後詩  
散帙隨跡陳江南雲樹裏渺渺空招魂

秀水曹伊人

南有兩曹君於我兼師友鹿野舍我去伊人繼其  
後君也才傑立胸藏援一二酉每嗤文體卑思爲制

作手瀾翻掇英華吐棄鄙芻狗客來耽枯棊布局  
度清晝盤餐味必精爲我滌卮酒俄然遐舉去百  
喚不回首更入年少場無乃用損壽京華滯旅櫬  
僕從皆烏有每念末路悲爲君沉歎久諸生預編  
纂宿昔君領袖未得見成書營魂歸土阜猗嗟山  
陽笛遺響哀林藪戚戚不忍言九原能起否

鹽官俞大文

永年不早達早達不永年俞生當弱冠鴈塔已聯  
翩丰姿何清瑩玉立晚風前時輩蒙一盼意氣如



申博集 卷一  
登仙修書責我里藹藹借羣賢借茲魯泮水聊作  
鳳池邊談吐必新穎聽者皆憬然予時尙孩穉未  
敢稱隨肩云胡玉堂資卒就縣尹銓聞君宦魏地  
政簡邑復偏相去幸密邇恍如聽揮絃蹉跎臺省  
擢二豎忽沉綿相如竟渴死徒有封禪篇故舊淪  
喪多如君尙可延賞志在強仕能不爲涕漣

江寧叢致公

來在鄒魯間聲華日流播如何孝廉船久久不我  
過憶昔與羣公文酒日唱和管絃疊相奏少長俱

在坐聆君話江南每使笑顏破分君咳唾餘亦足  
療饑餓雅志在刪述十載曾不惰每冀特達息中  
腸熱無那力疾下禮闈終焉不頽挫却讓汗血駒  
先爲帝王貨駸駸就衰晚歸掩柴扉臥寂寂遂至  
今愴哉文星墮平生九如堂翰墨留清課已矣隔  
夜臺招魂托哀夢

錢塘洪昉思

洪子抱不羈時稱酒人最廿載長安中悲歌氣蓋  
世君爲相門賓我始謝庭贅廣坐一相逢與論平

生契管中窺全豹未得見奇異快讀郢雪詞驚才  
甚閱肆徐聞遭擯斥反爲填詞累李白流夜郎名  
始重海內洋洋長生殿膾炙伶工肆此帙必流傳  
君亦可自慰聞君醉登舟捉月因失墜如何擅才  
名時命止於是百年一聚首餘皆離索地點檢新  
舊交誰如爾高致

同里毛艾仲

髻也生恨早年輩不相當與子同硯席已非少年  
場屢試蹶鹿鳴古體乃擅長撚鬚動眉睫吟聲益

高揚晦明風雨交與至輒登堂酒酣潑老墨餘韻  
猶淋漓浪晚來頗蕭瑟人謂君佯狂竊恠興猶昔肌  
肉潛消亡焉知早春日一瞑不復張闕里勝社初  
賴君得助勸評隲古道存不因勢低昂於今幸無  
廢朋來多遠方斯人獨不見令我神內傷

示同學

去日何須恨苦多惜陰當及未蹉跎人間好讀書  
難盡細把桑生鐵硯磨

賦得好雨知時節

偶來知有意不是做春寒野色東臯轉繁英上苑  
看蘇花迴紫陌潤柳占青巒人事傷淒寂陽和德  
自寬

又

一犁知土沃二麥望珠團憂歲心初慰尋芳計不  
難雲臺時啓閉春釀慶平安此力歸何有無私出  
大官

有懷阮巖公孝廉

自輟公車後宜開名士身如何餐苜蓿隨意混風

塵阮籍添踈放焦先若比隣懷君隔千里良會悵  
無因

紫騮馬

不見長安遊俠人青絲絡馬追飛塵桃花連錢耳  
批竹蹠躐金隄自逡巡欲覓封侯須駿騎飄搖直  
指龍沙地朝飲清泉長城窟暮在青海秋風裏垂  
韃揚鞭細柳營崑崙瀚海任橫行赤汗如珠四蹄  
熱馳驅與人同死生哀笳曉角淒復切中有蕭蕭  
聲不絕賀蘭流血幾時乾金閨空憶關山月

招隱

我志在登臨樓踪凌絕巘秋月藤蘿踈編籬鳴小  
犬山莊春夏交蒼壁半苔蘚聽泉既可娛枕石亦  
自遣寧無風雨交過此殆亦鮮寵辱不堪驚是非  
不與辯客云餐霞好答以採芝善度與全真期居  
然大道闡

山月五首效蘇長公體

一更山吐月雲破引清思徐徐上峭壁流光悉毫  
絲真同赤壁晚不似玉關時

又

二更山吐月潮生撼我宅光涵遠村樹煙景紛如  
織唱晚有漁舟一望江花白

又

三更山吐月中夜影沉沉金蛇卧沙磧松露灑衣  
襟寂寥無可說對君張玉琴

又

四更山吐月羣山四環翠冷波蕩無聲樓閣湧空  
際幽夢尚未終驚蟲忽鳴砌

又

五更山吐月太白奪其明斜飛上林杪曉露漸淒  
清客夢猶未斷古嶠一僧行

十洲分得鳳麟洲

海外偏聞擅地靈百祥奔赴極西滇家家會見歌  
麟趾戶戶皆宜集鳳翎瑤島瓊田綿萬里花香鳥  
語度千齡無由覓得弦膠去回首雲和島嶼青

聽顧天石話遊古桃源

羨君携得好詩回真向桃源古渡來晋代漁郎同

鼓棹秦時遺老對啣杯雲臺洞穴懸身入輞水風  
烟靦面開昔日淵明曾有記笑他猶作夢中猜

和美人詩四十首

樓上

春郊凝望思無窮小立娉婷倚半空綺陌王孫回  
首處却疑人在廣寒宮

蒼苔上

玉階何處印纖蹤剩襯金蓮軟翠穠春曉摘花和  
露立小園芳徑逐遊蜂

採蓮船上

的的芙蓉並蒂雙輕輕藕臂啓蓬窓綠衣紅艷俱  
零亂似送佳人遠涉江

繡榻上

愁捻銀針半晌癡更無心緒理殘絲日長每自翻  
新譜繡到鴛鴦欲睡時

馬上

斜跨雕鞍似欲飛腰肢偏遜玉驄肥恐教鞭影穿  
花去背却斜陽獨自歸

池上

浣紗女子十三餘自說兒家傍水居粧罷不須頻  
覽鏡刺桐花外有清渠

遷榭上

舞罷前溪態轉殊嬌音重整唱吳歛錦茵雖軟休  
長立原是情人掌上珠

採桑陌上

尋常粧束出香閨小摘桑芽向大隄爲怕逢人常  
背面青絲筐上露柔荑

鞦韆上

畫板盈盈閣繡鞋東風扶起鬢邊釵祇緣曾被佳人占能使鞦韆影亦佳

粧臺上

拂鏡清晨花自開試粧時候蝶紛來兒家寶髻梳偏懶不許檀郎立馬催

車上

青油小幔障芳塵約伴橋南去踏春若道女中無衛玠男兒擲果向何人

席上

畫堂絲竹正紛紛醉擁巫山一段雲不是紅裙能勸酒有誰將酒勸紅裙

牆上

春來無事不窺園隱約花枝在隔垣好是女牆遮一半耐人尋味更銷魂

雕欄上

庭院深深落照殘和身和影靠欄杆祇應時有相思淚靜把春纖細細彈

枕上

側印紅脂委髻鬟一宵清夢在巫山睡情濃後誰  
堪替除是檀郎玉臂灣

月下

玉質金波兩鬪妍淡黃柳外晚風前素羅衫子搖  
紈扇遙約嫦娥共不眠

鸚鵡架下

亦知夫婿隴邊遙兀坐春閨恨不消早起自尋鸚  
鵡教要他解語伴無聊

花下

小徑花鈴靜不敲看啣紅瓣燕歸巢近來添得閑  
心緒開到春風荳蔻稍

燈下

憶向秦機夜織勞懶將釵股剔蘭膏如今領扣含  
羞解怕見床前絳燭高

畫屏下

金釵十二寫嬌娥也向人間會踏歌看畫舍情人  
背立不知丰韻竟誰多



垂楊下

十五腰肢弱欲斜  
臨風綽約髻如鴉  
已將身作三眠柳  
不用章臺訪妾家

迴廊下

獨行小膽怯空廊  
猶自飛花撲面香  
曾記玉人迴抱處  
碧紗慚下月昏黃

夕陽下

輕涼別院晚粧成一抹紅霞檻外生  
聞道幽歡期此夜金烏何事尚分明

桐陰下

翠葉風搖露已零  
懷人此際立亭亭  
可憐一段生香態  
倒映無枝百尺青

窻下

曾向窻間剪素綾  
金刀徐放思騰騰  
掩窻畢竟人還在  
細語喁喁未滅燈

竹下

空谷佳人意轉幽  
天寒日暮竹脩脩  
倚紈桃李都無分  
獨向人間領素秋

湖山下

花徑迷藏漸入深自將弱質倚崎嶇非關愛立湖  
山畔聞說湖山有夢尋

林下

鬪草纔過三月三綠蕪深處覓宜男長林坐久香  
風至吹得桃腮欲半酣

簾下

月閉花羞不可拈淡烟疎雨隔簾纖侍兒略把蝦  
鬚捲剛得分明見鳳尖

流蘇帳下

滅燭和羞解汗衫帳羅寒處手摻摻春宵秘事無  
人識一半留痕在枕函

鏡中

明姿艷態誰堪擬月在碧天花在水若與畫眉郎  
並肩一雙比目清潭裏

亭中

春入園亭鶯百轉有人獨立珠簾捲試唱春歸人  
面詞春光欲近人偏遠

望中

隔花瞥見人嬌小不語不行何嬾嬾疑是高唐行  
雨歸巫山片石亭亭曉

夢中

良宵夢短惜不久白玉堂前攜素手醒後淒涼月  
半床脂香猶暈櫻桃口

香烟中

夜香燒殘未移步和暖如烟立花露疑是洛妃臨  
去時散作氤氳碧天霧

絲雨中

春遊未終絲雨斷侍女催歸履綦亂已拚羅襪付  
凌波更浥春衫似香汗

宮中

蛾眉自古不相讓一妾承恩六宮曠夜深不敢閉  
長門猶爲羊車遠凝望

山中

山居盡日無膏沐侍女牽蘿補茅屋芳草花時深  
閉門月明白伴梅花宿

畫中

施朱太紅粉太白聽去無聲捫無迹天上飛瓊期  
不來一幘留伴孤眠客

意中

天孫不斷機中織月滿姮娥又愁是阿嬌常在寸  
心間恍對傾城與傾國

夸父逐日

西逝金烏不可追勞人空見塚累累走窮滄海何  
由到渴死遐荒欲恨誰若木沉光先我去鄧林遺

杖到今悲百年便作千年計夸父由來未笑癡

姮娥奔月

杳眇星雲路不通如何得入廣寒宮履綦高舉凌  
天漢環珮無聲待曉風蟾吐清輝當枕簟桂零金  
粟墮房櫳當時后羿思偕老只合雙雙向此中

爲莊心遠題像

倚石凝神對鬪饜秋風吹動甲蕭颼戰場一片雄  
心在可是思封定遠侯

又

申椒集 卷下  
畫不猶人像亦奇如斯布景世間稀漆園曾對枯  
體歎惟有千年後裔知

繼漢

男

較輯

繼溥

申椒集卷下 終

跋

余自童稚宿食舅氏家輒見表兄又手成  
吟刺燭聯韻心艷羨之稍長為諸生則困  
於八股業未暇旁及也然每辭舅氏東歸  
海上輒歎風雅牢落能移我性情者絕少  
又耿々不忘讀表兄之詩積歲月復驅車  
仙源而表兄詩彌進又成數帙矣其數帙

之中且無境不備矣夫將為壯烈激楚之  
音必遊戰場戍壘間得金戈鐵馬之氣焉  
將為幽咽怨亂之音必遊荒墟廢苑間得  
零歌斷舞之氣焉將為磅礴渾灑之音必  
遊名山大澤間得志士高人之氣焉將為  
溫柔舊麗之音必遊朱樓翠榭間得剩粉  
零香之氣焉詩固因遊而成者也若吾表

兄藉豐履盛足跡未嘗遠遊何其詩之盡  
諸境而有之也是必沉酣于太白而得其  
雄放也浸淫于昌谷而探其幽竒也含吐  
于義山而得其微眇也三李之生平蓋皆  
盡歷諸境者兄能神遇而力到焉又何怪  
其不出戶庭若遊四海哉顧余涉吟理淺  
徒望其迷離之光雄渾之氣愛嗜之而不

忍釋適有友人力勸其鋟諸梓者將于是  
乎傳焉余聊學蠅綴驥尾間一日而馳千  
里可乎

東牟沙克岱題并書



